

重修兩淮鹽法志

兩淮鹽法志卷五十一

轉運門

掣驗下

泰州掣驗

同治二年十二月鹽政曾國藩札行運司照得楚西新鹽查出重觔必照全船包數扣算將鹽充公前於刊章內明晰聲敘規定章每包八十六觔內滷耗給予七觔半包索三觔半均屬從寬其稱內餘觔一併津貼商販計利甚厚體恤可謂周至豈容於八十六觔之外再夾重觔茲安慶鹽河卡運到西岸新鹽一百二十引飭據委

員將該司所呈庫稱抽包稱掣每包或重八十七八觔不等甚至有重九十觔者其艙面之鹽雖亦有八十三四觔而按船通扯每包總餘二三觔之多實屬不成事體當此法令伊始斷難稍事姑容除將重觔照章扣算提出充公外查泰州爲鹽運出江首要之區如果第一關認真稱掣將包內觔重較准開江上游各岸卽不費事若泰州任意放觔卽使上游稱掣嚴禁沿途亦可停泊覓售先將重觔卸輕爲害實非淺鮮見在安慶抽稱並不假胥吏之手鹽船到卡由牙釐局隨時另派親信委員會同卡員照艙口清單點驗抽稱絲毫不能舞弊

合特嚴飭該司遵照嚴督泰州稱掣委員不論營鹽官  
鹽商鹽總須破除情面親自抽稱儻委員竟敢串通壩  
商得賄賣放立即詳參並提壩商從重究辦一面示諭  
商販切勿再蹈前轍致被上游卡員查出因數包重罰  
有害全船自誤運銷兼受重罰

### 瓜洲掣驗

同治四年五月鹽政曾國藩刊定瓜洲設棧章程第七條  
稅鹽舊章本由運司派員在泰州之四浦分浦抽掣此  
次改道新河口內河屯船與外江大船相離咫尺最易  
漏私從前綱鹽出場先在泰壩抽掣行至儀徵再行驗

掣本係抽掣兩道應將南掣同知暨南批驗大使移駐新河口於過壩時逐船抽掣如有重飭照例懲辦近來金陵掣驗卡查出江船夾私幾於無船不有類皆受戢時就地買帶瓜洲向爲私鹽出沒之區尤不可不認真搜查應責成招商局派出查船委員親駐河口逐船嚴搜以杜夾帶

同治五年十一月瓜棧道員程國熙稟擬章程八條

一過掣宜擇寬地也查瓜口一帶居民叢雜船隻亦多捆工稱手旣施展不開稽查督率亦諸多不便惟查有濟運橋分棧後段隙地尙寬擬令代行程令率同各委

員均移駐分棧以資照料所有挂號輪掣悉照瓜棧章程

一出江仍宜過掣也擬令內河鹽船悉停泊四里鋪以上聽候挨次提掣提至濟運橋分棧門首仍將鹽包起岸過掣過掣之後擡上駁船仍由駁船駁運江船受載一江船宜移泊受載也查金山對岸有回溜一處駁船身小載重風濤堪虞查瓜洲大口以上半里許新漲泥灘可以拋錨泊船擬令江販於受載之日將船移泊該處以便受載所有各岸查艙委員亦應移駐瓜口以便搜查

一濟運橋宜安設木檔也旣在濟運橋過掣誠恐內河鹽船乘閒透私擬於河面安設木檔凡內河鹽船悉在檔外聽候過掣以清界限

一駁船出江宜嚴行查驗也瓜洲口門本有淮揚水師吳提督礮船並運司委員陶經歷駐劄該處專辦緝私見將瓜棧礮船逐一編列號次給予蓋印旗幟一面以防弊混仍請札飭吳提督陶經歷凡駁船受載出江經瓜洲口門應逐船查驗放行

一瓜口空船宜全行押逐也查瓜口爲南北通行要路茲由該處出江凡空重鹽船並駁船均已齊集設再有

別項空船必虞擁擠擬請札飭吳提督將瓜洲口門以內所有守載及打油修船各船概令移泊外江以免阻塞

一北鹽宜起岸改捆也查北鹽鹽包飭重不一包索尤多破爛必須逐包稱掣換包改捆濟運橋無倉可儲擬照西壩就岸堆鹽辦法就濟運橋後段隙地用蘆芭圍出大院北鹽船到悉起該處堆儲另搭茅屋三間以便改捆並照料北鹽之人住宿仍多備籤席以資遮蓋其過掣章程悉照南鹽辦理

一濟運橋宜派礮船巡緝也查內河鹽船既停橋外北



鹽又起岸改捆必須嚴行巡緝除軍府派勇稽查彈壓外擬請札飭吳提督茅參將酌派礮船數隻移泊濟運橋以上以資查緝

同治十二年二月淮運司方濬頤瓜棧道員薛書常會詳向來場鹽到壩泰屬之鹽由泰壩官督同四浦委員掣驗過壩通屬之鹽就近歸南門委員掣驗鹽船直達瓜洲今改爲壩交所有通泰兩屬場鹽俱應在壩堆儲仍應責成泰壩官先行照章掣驗遇有缺溢註明重照凡到壩鹽船仍按五日一次開摺呈報總棧查考總棧卽以到壩次序編入冊檔隨時榜示棧門聽商挨次採買

其到壩之鹽未經上堆以前事歸壩官其上堆以後一切過掣交客事歸總棧以分疆界

謹按是年四月鹽政李宗義奏明瓜洲鹽棧改復儀徵

### 儀徵掣驗

同治十三年二月儀徵鹽棧道員龐際雲稟棧鹽缺觔爲透私之大弊鹽觔出場至泰壩過掣原所以查重觔也乃泰掣溢而到棧報缺其缺不在商而在屯船及過浦之人職道到棧以來深知此弊嚴加考核數月尙無報缺而細考實皆有溢欲堵缺觔必先從查溢觔始查泰

壩掣鹽溢觔於大票註明職道去年十二月間即將大票逐一稽查缺觔固少合觔者亦百無二三合觔仍軒稱也餘則率皆有溢卽以安豐最少之場計之每票率溢至二千餘觔以此類推一月到棧之鹽照泰掣之數溢觔奚止數萬何以在棧過掣總未見有一票報溢職道與棧商反覆辨論詳加考核札飭泰壩官認真掣驗不得約畧填數一面派委妥員督率該管司事凡場鹽到棧投照掛號之時先將泰壩掣見數目查明另立一簿遇有溢觔逐票登記並由管浦委員嚴督場商暨過浦人等於此鹽掣竣後報明查對如泰壩掣溢一千觔

儀棧究竟掣溢若干勛務得確數隨時存倉另堆計自  
二月初五日起至二十五日前訂交單過掣漸清之日  
止定章甫及兩旬而溢鹽已有三萬八千餘勛之多場  
商甚爲踴躍職道不敢謂此卽無弊而從此或漸次歸  
眞除仍嚴飭委員司事上緊稽查外惟此項溢勛若不  
嚴行查出卽變而爲私盡歸烏有然查出之後如照重  
勛割沒場商積困豈能不加體恤且恐泰壩從此卽不  
報溢稱手羣相欺飾轉無稽考職道不揣冒昧遇事變  
通已諭商人將棧掣溢勛仍歸該商另行堆儲積有成  
數照交錢糧挨輪定買是化私爲官於公事無損於商

人有益除此項溢觔將來堆鹽日久如有缺觔卽從此  
彌補外究竟積有成數應如何銷售及積引若干卽准  
出售之處前無辦過成案相應稟請批示祇遵經鹽政  
李宗義批該棧掣鹽歷年每多缺觔積弊已深見經該  
道設法整頓先從稽查溢觔著手嚴督管浦委員於過  
掣後將泰壩掣見數目逐票查對定章甫及兩旬已溢  
三萬八千餘觔辦理尙屬認真此項鹽觔據議仍歸該  
商另儲將來堆鹽有缺卽以此彌補其餘積有成數卽  
照交錢糧挨輪定買亦屬可行仰將掣出溢觔每月於  
月終配成引數開摺具報

## 金陵掣驗

同治三年正月鹽政曾國藩札大勝關一卡本係抽稱皖岸引鹽嗣定以楚西兩岸之鹽亦由該卡抽稱加戳而不截角均經先後通飭在案該卡爲淮鹽出江後抽掣之第一關相離儀徵未遠尤易滋弊必得專派委員經理以昭周密因派道員會同釐卡前往大勝關卡會辦楚西皖引鹽抽稱等事務須督率卡役認真掣驗如查有重劬卽按全船包數扣罰儻有夾帶私鹽立即提鹽充公其包外之夾包較之包內之夾劬爲私尤鉅又有並非商販或係各營員并過往客官坐船隨船均須一

律嚴查該處係長江查私第一關頭切勿疏畧仍將查過商名引數按旬開摺具報

同治三年三月大勝關掣驗卡道員張慶安稟陳窒礙情形四條 一都營餉鹽於既奉刊章以後仍裝十二包成引紛紛運赴楚岸且既未領有淮字護照亦未准淮運司移知昨經具稟請示並諭令原來押運委員直隸候補府經歷陳繼高運至安慶聽候牙釐總局掣驗完釐嗣後此項鹽船到境應如何辦理之處應候憲示祇遵 一大營食鹽運至大勝關卽轉售水販或用舢板皆稱民鹽裝運上駛掣驗委員卽不能過問竊思師駐

金陵萬竈不能淡食自難阻其轉運惟無定制慮其不  
無流弊尤難保無假冒官弁船隻闖關而過者引鹽爲  
籌餉一大宗似此發令之初尤須防範周密庶民用軍  
儲兩有裨益嗣後此項鹽船未領憲台護票是否准其  
運過大勝關以上或飭知一律掣驗抽稱以符定制  
一訪查常有船隻並未領有護票或裝運數十石及數  
百石或係民運或係官運統名曰民鹽一經大勝關釐  
局收釐放行卽紛紛上駛並不投驗越卡而過竊思設  
卡掣驗原期杜私販而行官引認運引鹽如有夾包重  
舛尙須嚴辦而此等厯厯在目難保其不私行賤售以



壞鹽法應請一體嚴禁不得再有民鹽名目以防侵灌而昭平允 一運司給發護票運蘇字號引鹽查此項引鹽向運銷江甯府屬之上元江甯高淳溧水句容江浦六合七縣及揚州府之儀徵縣凡運赴高淳溧水者必由大勝關上行至太平府而至東壩大勝關卽係江甯縣界旣未奉有憲台護票似未便放行應候示祇遵嗣經鹽政曾國藩批第一條都營餉鹽由司給文護運者只有二千八百引應一律掣驗准其放行昨已專案批示第二條各營食鹽新章內刊明如有藉食鹽爲名私自下場採買希圖不完釐課卽與販私無異如敢違

犯無論何營員弁查出一律嚴辦等語何以大勝關尙有營中食鹽紛紛上駛難保無弁勇假冒情事候卽咨明浙江撫部院會查明飭禁該道一面嚴拿數起羈留不放專稟來省請示至該處撫恤經費應由會撫部院另行籌欸酌量撥濟不與鹽務相干第三條裝運數十石及數百石之無票民鹽卽係私鹽豈容任其侵灌昨據忠運司稟已飭該卡嚴查起鹽充公罰完課釐候再刊頒告示將各營食鹽無票民鹽一概禁止第四條江甯府屬之鹽已札金柱關截留不准上侵皖界查江甯七屬惟高淳溧水係在大勝關以上兩邑所需鹽觔無

多候飭淮運司酌定該兩縣應於江甯府等所定額數  
三萬引內每月撥運若干以示限制其請運高溧食鹽  
小販令赴淮南總局呈明由局在於票內註明運赴高  
溧溧水字樣加蓋局印並備文咨會該卡及金柱關卡  
以便驗明收釐放行其餘一概不准過卡見在皖岸銷  
數已極疲滯皆被食鹽等項充斥侵灌若不畫清引界  
必致漸侵楚西有壞全局該卡係咽喉要隘關繫甚重  
仰卽實力認真辦理毋畏難避嫌以期杜絕私蹤是爲  
至要

同治五年正月大勝關掣驗卡委員陳茂稟大勝關去辰

棧不遠爲掣驗淮鹽第一總卡摺查雖極認真而上游  
各路私鹽仍復不絕者推求其故乃在日間查過之船  
或守風不遽開行彼未查之船慮其多包遂移寄於日  
閒已查之船亦有未至數里遂停泊者此多爲便於起  
岸售賣也查觀音門至下關縣長約二十里皆爲停泊  
鹽船之所本有駐巡礮船閒有漁戶習人夜閒往來江  
上今擬出示曉諭凡鹽船夜晚無故起鹽逕由礮船拏  
獲者全數充賞有報信由礮船拏獲者以一半賞礮船  
一半賞報信之人鹽須解局由局變價給賞俾知有利  
可圖無不留心時一瞭望則人人皆我巡役儻經拏獲

一二次必不敢乘夜起鹽再加日間攪查認真將查過不行之船時復查驗一過如此設法似覺稍有裨益儻蒙採擇應請札飭水師營官轉飭各哨隨時隨地留心緝拏經鹽政李鴻章批允

同治五年十二月署鹽政李鴻章批金陵掣驗卡陳茂稟請撥給礮船查私一案查草鞋峽下卡爲往來船隻咽喉之地查私最關緊要駐卡礮船僅止一號又因動輒更換呼應不靈准由該令自備舢板兩隻選募水勇歸局籌給口糧核實開支專駐下卡巡護所需船隻見在裁撤各水師必有空船可撥仰候札飭水師營務處桂

道船廠陳鎮商撥已撤舢板礮船兩號發交該局雇勇駐巡此外由營調赴該卡之船仍飭照常駐守如無緊要軍事毋庸屢次抽調以資熟習

同治七年閏四月鹽政曾國藩批金陵掣驗委員稟礮船連檣闖卡不服盤查一案前經本部堂從嚴示禁而此風仍未稍戢實屬可惡該卡駐巡礮船僅止二號顧此失彼尙屬實情據請添撥礮船查外江水師正後營傳提督敏才本駐草鞋峽仰候札飭該提督就近揀選得力舢板四號移駐該卡會同巡緝該守并可隨時與傳提督和衷商辦至各營礮船藉差裝鹽影射漁利固應

嚴辦而奉公守法在於長江行駛之船自以船內無鹽  
一任卡所搖旗招呼置若罔聞卡員勢必窮追致成鬪  
毆亦屬不成事體蓋礮船卽奉要差而船身輕便非重  
載商船可比經過該卡停驗片刻並非強以所難况查  
船內實無鹽觔亦必隨查隨放斷不致貽誤差事嗣後  
無論何營之船經過金陵掣驗鹽卡必須落篷聽驗並  
候咨明彭部堂黃軍門會列三銜出示並通飭內江外  
江水師淮揚水師各統領營官一律傳諭遵照其下卡  
原設司事人等不敷差遣准其酌加司事一名勇丁兩  
名以資辦公

同治七年七月鹽政曾國藩批大勝關掣驗卡員稟該卡查鹽向有抽掣摺查之分抽掣者凡鹽船到卡投票後由委員於艙單內親自點定一艙注明封固交督查人等上船後始行折看卽照點定之艙抽掣所以杜包內重觔之弊也摺查者凡鹽船艙口有數艙至數十艙不等摺手人等必須逐艙用摺查驗所以杜包外夾私之弊也從前船戶包外夾私居多近因該卡搜私嚴密往往將私鹽貫於整包之內此弊亦大不可不設法禁之本部堂細加參酌刊章內載全船核扣之罰立法最嚴原因鹽船過卡勢不能逐船逐艙掣驗抽掣一艙遇有



重舳卽他艙之無重舳者亦必照罰則船戶深恐全船受累自不敢任意影射是嚴辦點定之艙他艙之私不禁自絕嗣後如點定之艙查出重舳每包祇在二三舳以內仍照向例扣罰如在四五舳以上明係有心貫包除將重舳照全船計算注票扣提外再提船戶由該守立予棍責枷號江干以昭炯戒此外非由委員點定之艙搬手人等祇准搜查包外夾私不必再從包內苛求庶船戶可收懲一儆百之效卡役亦免高下其手之弊矣

光緒十四年三月金陵下關掣驗卡委員陳善稟沙漫洲

西江口等處均蒙批定章程照給五成賞犒舉局草鞋  
賊卡大勝關上卡與沙漠洲等處同一緝私仰懇准  
照五成給賞至查獲票外夾私注明護票者仍照舊章  
二成給賞不敢援以爲例經鹽政曾國荃批該卡爲查  
鹽總匯賞犒一律二成計數已不爲少定章已久未便  
率改

大通掣驗

同治四年六月安慶掣驗卡委員主事袁愛存稟奉憲諭  
以安慶掣驗應擇鹽船易於停泊之處專設一卡查安  
慶省垣上下數十里內並無鹽船易於停泊之處惟下

游蕪湖向爲設關之所次則大通一鎮洲勢重疊江行舟楫向多艤集於此見在招商局設於荷葉洲該洲長五十餘里該局所設鹽卡約在該洲適中皖岸鹽艘停泊其處俟挨輪到時始提船鹽十票至局發售若於對岸上游數里大通本鎮設卡掣驗楚湘兩岸之鹽彼此兩無妨礙見在江水盛漲安慶鹽河大船尙能駛入大通街市水深尺許似應俟水勢稍落再行籌議移卡又查安慶掣驗卡有委員三人厯奉曾前部堂札飭鹽船行走遲滯皆由該卡羈延等因四月初札委司員駐卡會督辦理查安慶應查鹽數定額三十餘萬引船約四

千餘艘每遇南風無船可驗若連日北風則聯踪上駛  
一日之間鹽船有聚至一二百艘者委員一人帶同監  
稱護勇等遵奉前憲批定章程辰初開稱申末收稱而  
盤查包數抽稱鹽勦每日所查不過二十船之數該鹽  
每票多則七八船少亦四五船有一船未經查畢仍不  
免於守候伏念安慶掣驗實兼湖口武穴兩卡之鹽與  
大勝關情形畧同且較大勝關多一切角彙報之事准  
留委員二員或飭令何藩司另委佐雜二員來卡隨同  
抽查並准添派文案一名清書三名護勇六名以資辦  
公又查湖口卡用由西岸督銷局費內支給武穴卡用

由漢岸督銷局費內支給惟大勝關安慶鹽河二卡未  
議經費似應於各岸補完安慶釐金內開銷先由安慶  
牙釐局支給應用統歸該局報銷經鹽政李鴻章批查  
安慶停泊鹽船商販向稱不便據議改設大通本鎮設  
卡抽掣事屬可行該卡過鹽較多所請酌留委員二名  
亦准照辦報開文案清書監稱護勇坐船均如所議辦  
理紙張油燭月支銀六兩其暫時局租及燈旗什物等  
項應由該主事撙節支用核實開報將來移設大通時  
准在牙釐局借款建造房屋數間以資辦公月支薪水  
等項前已札飭牙釐局按月支給關防已發刊仰卽專

差前來具領仍俟水勢稍落卡所移設時再行通飭知照

同治四年十月安慶掣驗卡袁愛存稟大通爲鹽船易於停泊之所而楚西運船夾帶私鹽俱在大通迤上沿途售盡然後過安慶復查已成積習見遵批擬於二十六日移卡大通暫租民房設卡辦公其已赴大通上游之船沿途照章掣驗截角放行伏乞通飭各招商督銷局出示知照并請將前奉批准在牙釐局借款建造房屋以資辦公之案札飭牙釐局遵照辦理經鹽政李鴻章批允

同治六年十月大通掣驗卡袁愛存稟竊惟鹽船夾私牢不可破其夾私之多寡總視查驗之疏密卽如見在金陵掣驗最嚴無可倖脫而查獲之私尙復層見迭出迨至卑卡猶時有掣出多觔多包若辦理稍鬆更復何所不至卑卡所查楚西引鹽每值北風聯舩麇集往往已查者守風未開未查者附幫灣泊江流湍急鹽舩笨重雖飭令已查者駛赴上游而逆風移舟實有難以刻繩之處彼此寄頓誠恐難免又有一種小船販賣米煤蔬菜等物往來鹽幫專以易取私鹽爲幸卑卡未設巡船每當停泊稍多阻風不開輒密雇小舟潛行巡歷閒遇

賣物之船聯泊鹽艘隨時驅逐必俟大幫上駛始行停  
撤前聞金陵掣驗卡因恐本卡原設巡船耳目難周稟  
奉前署憲李批准札飭附近礮船優示賞格一體緝私  
在案查卑卡同治四年奉前署憲李轉咨長江水師札  
派礮船二隻移駐大通專爲防護鹽艘第此項礮船二  
隻終年灣泊毫無所事擬請轉咨長江水師軍門黃札  
飭該礮船會同卑卡於到卡停泊鹽艘不時周歷巡查  
除掣出多舳多包照舊辦理外如有夜晚私行起坡彼  
此過載小船偷漏等弊一經瞭見卽行緝拏不得通同  
賣放並不准妄拏票內商鹽緝獲之私全行充賞惟必



須解由卑卡過稱咨送皖鹽局發商變價不得擅行售  
賣致滋流弊至充賞之項係由卑卡巡勇緝獲者以七  
成賞卡勇三成歸礮船其由礮船緝獲者以七成歸礮  
船三成歸卡勇似此明定章程庶激勸有資巡緝踴躍  
再司員所辦鹽卡自同治四年秋開遵奉前署憲李札  
飭移設大通并批定薪水工食等款由釐局撥給均已  
足敷辦公惟置辦燈旗什物等件閱時已久多有損壞  
不得不隨時更換修補所建卡屋去年大水淹浸局內  
深二尺餘將及兩月新土未堅牆垣地面不得不隨時  
葺理再卑卡所查引鹽視湖口武穴爲多未設巡船每

遇鹽艘屬集閒或密雇小舟潛行巡查隨雇隨撤難以  
拘定均未便瑣瑣報銷擬請每月量給局用若干以資  
辦公經鹽政曾國藩批大通局巡護礮船見有六號昨  
據李守稟請咨明彭部堂照常駐泊該主事近在咫尺  
如需礮船協緝儘可會商李守隨時酌撥所請增給局  
用未便開端惟武穴李令見准每月加給薪水銀二十  
兩該主事事同一律准其照數加給卽在變價項下支  
領

同治八年正月鹽政馬新貽札據大通掣驗卡袁主事稟  
該卡設在大通本鎮與荷葉洲查貨釐卡一江相隔勢

難令過境船隻於釐卡查貨完釐後再行過江灣泊查  
私司員所募護勇自合撥住對江下游釐卡懇請札飭  
大通釐局王牧壽祺會同查緝最爲妥便該牧素肯任  
事若令認真會查必能於事有濟等情除批飭照行外  
合行札飭大通釐局安徽牙釐總局遵照

同治八年正月鹽政馬新貽批大通掣驗卡稟江安各釐  
卡業經釐定所有該卡應領各項自應自八年正月起  
改由大通招商局於報銷項下給領

同治八年三月鹽政馬新貽長江水師提督黃翼升札行  
照得近來各岸淮銷疲滯皆由私鹽充斥訪悉私鹽中

以礮船夾帶爲最雖節經通飭各卡嚴查然不重立稽  
查之法仍易弊混茲本部堂會商定議嗣後凡有礮船  
由下游上駛該營官必須先行嚴查並給以護文飭令  
經過查鹽各卡均須落篷持文挂號聽候查驗其護文  
內由各該卡蓋用查訖圖記回營時將原領護文繳銷  
如查無此項圖記或與他船所印圖記不同確係僞造  
卽行參辦自此次通飭之後如再查有礮船夾帶及不  
遵查驗之礮船各該營並干參究慎勿玩視

同治八年六月鹽政馬新貽批大通掣驗卡稟該局見被  
水淹一俟稍落後准將卡房擰節修葺核實稟銷至該

卡之地既爲善堂基址准自七月起給地租錢三千文以資津貼

同治八年八月大通掣驗卡袁愛存稟鹽船夾私向係銅習卑卡自遵札嚴緝礮私派委倪從九文縉住劄對江分卡辦理其赴查楚西鹽船祇有史委員長順一員誠恐不敷司員不時親往分查茲奉准由皖岸酌撥委員協查辦理益覺裕如惟查疏銷以緝私爲要務而見在皖岸之私則以營私浙私爲兩大宗而楚西次之蓋楚西夾私經金陵下關嚴查每旬報獲層見迭出聞有漏網僅係百密之一疏卑卡查獲亦復不少且該船抵卡

掛號卑卡始行赴查其由金陵上至大通四百餘里之內均可灑賣若卑卡查緝倖脫則楚西兩岸價值尤昂其在大通以上皖岸售銷似當無幾至於上駛礮船前奉憲札會同長江提督軍門通飭水師各營礮船奉差給與路票由各卡蓋用查訖戳記如差回查未蓋戳卽行參辦等因茲查經由卑卡查過之船業已近百而呈票蓋戳者不及十船其餘閒有查出來夾私十餘起其何營何哨哨官何名宛轉誘詢堅不吐實因爲數無多並非躉裝私鹽業已遵提難再深究惟過卡之船祇十之七八而由江北六百丈上駛者亦有十之二三若非夾

私畏查何以避洲夾坦途反由外江險浪查六百丈一帶江寬溜急雖駐劄多船亦難堵斷惟有懇請憲台再行通飭各營先將差回票內未經各卡蓋戳之船嚴行申飭以後如有再不持票蓋戳者定行嚴參庶不致視爲具文營私一項冀可稍戢此外尙有武昌長沙衡州江西九江安慶廬州一帶礮船向不遵查惟恃婉言開導未致滋生事端所幸軍務旣平奉差自當日減至於甯波之船慣運浙私頗有由江北六百丈聯艚而上者此項船隻經由關卡闖越爲常近據釐卡分駐江北礮船云稱該船每幫數號至十餘號不等駕駛靈快他船

不能追及查浙私在金陵以下多不發賣一入皖境則處處可賣似於岸銷關繫尤鉅查皖局歷辦均派上下游緝私委員時有報獲之案擬俟袁道回局時會商妥籌辦理經鹽政馬新貽批據稟該卡經過之船業已近百而呈票蓋戳者不及十船如此任意闖卡視嚴札爲具文實屬膽玩仰候再行通飭各營先將會給護文查無該卡加蓋圖記者稟候懲辦一二以昭炯戒嗣後如再查有越卡夾私之船定行從嚴撤參至楚西皖各省礮船不服盤查並候咨請各部堂院一體嚴飭遵照

同治九年六月長江水師提督黃翼升咨准貴督部堂咨



以礮船經過各卡由卡蓋用查訖圖記回營繳銷如無圖記或與他船圖記不同卽係偽造取黏各局卡查驗圖式咨會商酌辦理等因查沿江卡局甚多礮船經過是卡皆須投驗蓋戳似覺煩不勝煩且有緊要差使之船雖停帆片刻終不免藉口因局延誤查孔家涵乃裏下河總口大勝關鹽卡爲帆檣必由之地祇以該二局查察礮船加蓋戳記由營驗銷如無該局戳記卽行嚴辦既可無夾私之弊且免漏驗之虞經鹽政咨復照咨辦理

光緒三年七月兩江總督沈葆楨暨漕督安徽江蘇江西

巡撫會示照得礮船夾帶私鹽大千厲禁前經前督部堂馬長江提督軍門黃會商定議凡礮船自下游上駛該營官必須先行嚴查給以護文飭令經過查鹽各卡卽行落篷持文挂號聽候查驗其護文內由各該卡蓋用查訖圖記回營時將原領護文繳銷如查無此項圖記或與他船所印圖記不同確係僞造卽行參辦疊經通飭示諭在案近來管帶礮船各哨弁日久玩生又復夾帶鹽觔硬行闖卡前據辦理沿江緝私楊道稟獲帶私礮船哨弁劉太茂卽經提省訊明立按軍法梟首沙漫洲示衆勇丁五名均割去左耳遞回原籍功令何等

森嚴該哨弁等切勿以身嘗試合特出示嚴禁爲此示  
仰礮船弁勇人等知悉嗣後無論經過何處鹽卡均須  
恪守定章落篷聽驗儻敢不服盤查定卽提轅嚴辦決  
不寬貸

湖口掣驗

同治二年十月湖口鹽卡委員知州何敦五等稟奉憲札  
委於湖口地方設立鹽卡會同嚴密稽查如遇新鹽到  
卡迅速驗票查船鹽數相符將票截角放行其無票及  
船戶夾帶私鹽嚴查懲辦遵卽會商查湖口之西岸大  
王廟地方與釐局較近此時水落尙可停泊大船擬在

該處設卡當經水師後營丁鎮派撥遊擊黃其才舢板一號以備查船之需

同治四年三月江西督銷局道員程桓生稟准鹽運至西岸經過大勝關安慶湖口各卡照章掣驗均於票內註明查驗月日並需蓋用關防以備查考各卡歷經遵辦在案前因商人吉祥繳到護照一張未經大勝關卡註明查驗月日並未蓋有關防核查該卡旬報卷內亦未移報有案據稱係未知大勝關舊卡已移於儀鳳門外之故究屬不合應飭運回俟補查到日再行掣驗蓋戳放行以杜偷漏而昭核實經鹽政曾國藩批應將該商

此票鹽勛限遲一月挨售以示薄懲嗣後如無掣驗戳記仍應核其情節隨時稟究

同治五年四月江西督銷局道員孫長紱稟運商天興順所運淮字一千七百九十六號護照之一百四十引行至吳鎮由該分局換給駁票運省彙繳護照覆加查核既未經湖口卡注明查驗月日並未截角蓋用關防惟大勝關及大通卡一律蓋有關防戳記並未注明重勛夾私字樣或因火夫押運實係鄉愚無知加以船戶初裝引鹽諸欠諳練非出有心偷漏尙屬情有可原然與定章究屬不符似應酌量示罰用昭儆戒第查前項鹽

勛業已挨號開售所有價內給商之項擬罰停一月發交領收以示薄懲經鹽政李鴻章批允

光緒八年三月江西督銷局臬司張岳齡稟查西岸掣驗原在星子縣之青山司同治二年經曾文正公專飭委員在於湖口地方設卡辦理歷有年所岳齡前因鹽船夾私灑賣滋弊良多該縣城倚石山泊船無所梅家洲地隔江面風浪堪虞掣驗委員不能常時親往僅靠司事勇丁難以信心因之採訪人言妄有移設姑塘之說細爲考究鹽船一過湖口如姑塘青山等處雖自岸下船較爲穩便而湖面在在可通更難稽查不如舊地之

扼要也經鹽政左宗棠批允

光緒九年二月江西督銷局臬司張岳齡稟查湖口掣驗卡查獲票外夾包既經涂道面稟由卡提出俟有成數知照吳城分局飭令解九江關稅礮船於交餉回吳之便運至吳局銷售變價仍將銀兩解歸本局合併充公自應遵照辦理惟此項變價可否查照金陵下關大通等卡章程提出一成解歸湖口卡充賞其餘九成銀兩卽由本局隨同重劬變價彙案充公經鹽政左宗棠批查獲私鹽變價銀兩准照章以一成充賞九成充公

光緒十一年正月江西湖口鹽卡委員汪世澤稟卑卡設

立湖口東岸鐘山峭立西岸沙洲淺互凡鹽船乘風到卡必須停錨中流以俟掣驗而在卡除坐船以外向未設有船隻祇能雇小划前往抽查水溜浪急甚屬危險前卡員涂道椿年曾以大概情形稟請添置紅船一號當蒙允准照辦今據湖口船廠委員陳牧大源將船加式造成開報送交前來連購船中器具等件其合庫平銀一百九十八兩七錢三分三釐三毫七絲四忽船價就在提私充公銀兩項下支放并撥卡勇六名以資駕運理合稟明立案經鹽政曾國荃批允

武穴掣驗



同治三年二月鹽政曾國藩札照得淮鹽運楚改復綱引業經本部堂刊定章程飭發辦理在案見在楚岸新鹽將次抵岸亟應委員前赴湖北武穴地方設卡稽查新鹽到卡迅速驗票查包過稱鹽數相符將票截角放行其有多觔夾帶將鹽提出充公如遇無票淮私及皖岸上侵之鹽分別截留拏辦

同治三年三月鹽政曾國藩批武穴卡員稟陳局用一案見據督銷局杜道來函擬在武穴設緝私總巡酌帶礮船會同該令經理已函復照辦緝私既月派礮船彈壓查驗商鹽毋須重派至該卡開銷各款均照湖口之例

文案一名月支薪水銀八兩監掣二名每名月支工食銀六兩護勇四名每名月支口糧銀四兩二錢坐船一隻月給水腳錢三十六千文該令每月薪水銀四十兩紙張油燭每月六兩其局租及開卡應用旗燈之類仰卽樽節支用另行開報

同治四年四月鹽政曾國藩批武穴卡員稟到卡日期一件包外夾帶弊更甚於包內重筋夾帶有溢於包數之外者是爲包私有藏於各包之底鋪板一層下匿散鹽者是爲散私尤應認真搜查一面約束卡役人等毋任顆粒賄縱該員初試以事須以勤廉二字爲本勤則眼

到心到身到久之將無事不知廉則已潔家丁潔書役  
潔久之將無人不畏反是則流弊百出聲名難保切戒  
切戒至囑至囑

同治四年五月鹽政曾國藩批武穴卡員稟查出夾私行  
賄之船一案辦理尙屬認真此後水手人等如敢再有  
行賄情弊除將鹽勛起岸充公外應提行賄之人卽在  
江干枷號以示懲儆所獲夾私應解督銷局變價分別  
提賞充公

同治四年九月署鹽政李鴻章批武穴卡員稟運販行賄  
一案護勇能抱贓出首具見約束尙嚴然行賄之朱浩

得以藏匿無蹤則必因該令未能親自掣驗之故若親自掣驗該運販必無從營求縱有行賄之人當時即可弋獲矣聞各卡勇役收賄竟有數十兩之多者仍細心查禁爲要所查重劬照章批入護票賄洋四元易錢給賞自應如此辦理仰湖北督銷局轉飭嗣後過船務須親督掣驗隨到隨查該卡近在江濱詣查並不勞乏也

同治四年十一月署鹽政李鴻章批湖北督銷局詳武穴查驗鹽船前派之人不敷辦公准其添募監稱二名護勇二名月需工食仍由該局照案支給至掣驗卡搜獲夾私與專緝散私有閒准提變價二成充賞各卡一律

如此該卡未便獨異應令循照舊章辦理

同治五年九月署鹽政李鴻章批湖北督銷局詳查本年四月間金陵掣驗鹽卡曾有營弁張立生扣留局稱情事當經飭府嚴辦將弁褫革重責枷號在案茲據詳武穴鹽卡復有商夥向燕邨及船戶李廣義等膽敢將局頒該卡庫稱搶去藐玩已極仰俟該船到漢迅卽飭提該商夥等從嚴訊究詳辦以杜刁風

同治六年九月鹽政曾國藩批武穴卡員稟撥礮船一案督銷局所有礮船解餉巡護事務亦繁勢難分撥該處巡鹽局既有礮船兩號可以一號出巡一號留局兼顧

該卡仰卽錄批移明緝私委員隨時互相照料

同治六年九月鹽政曾國藩批武穴卡員稟鹽船避險一案查重載鹽船適遇木簾洶屬危險一經撞淹於課餉商本所關匪細仰候咨明李署部堂飭釐卡嗣後木簾務令避出該卡鹽船向南岸行駛免致失事

同治六年十月鹽政曾國藩批武穴卡員稟艙單失落一案據稟湘商聚和貞失去艙單一張既經該卡查驗鹽數核與護票相符給文放行辦理尙妥仰候札飭湘岸督銷局俟該船到岸補行截角此後如遇失落艙單護票等事應隨時察酌情形稟報無庸預定章程也

光緒二十二年正月湖北督銷局道員程桓生據武穴分局稟稱武鎮濱臨大江鹽船不便停泊遞奉批飭建倉儲鹽先後建立六倉鹽船隨到隨起固泯風浪之虞惟地方人煙稠密尤慮祝融草屋茅棚又時有不戒於火以是思籌備預防之計各商倉等亦均願爲集腋共勦厥成統計各倉堆積淮鹽時有三萬餘引釐課商本約有五十餘萬爲數甚鉅關繫匪輕是宜亟爲設法創置水龍以備無患然事歸局辦開支旣多進出尤慮不便籌思再四擬由卑局倡捐洋龍一架交樂善堂酌議章程妥爲經理其應置隨龍器具並太平缸以及夫役工食一

切經費由各商鹽倉自本年正月起按照倉內儲鹽數目每包各出錢一文通年核計約共輸錢四百餘串其錢由各倉代收歸樂善堂按月具領核實支用儻日後經費充裕再行議減合轉陳明經鹽政沈葆楨批允

光緒七年十一月鹽政劉坤一札行湖北督銷局近聞下關武穴兩卡均有私受船戶陋規情弊武穴且有每船收洋十數元之說如果屬實則卡役人等一經受賄稽查不能認真船戶水手毫無顧忌勢必互相效尤肆意夾帶侵害岸銷流弊不可窮詰該兩卡前辦委員一則病故一則丁艱司事卡役人等或乘委員離卡公然舞



弊誠難保其必無下關卡見經特派道員前往力圖整頓武穴事同一律新派之王守甫經蒞卡無所用其迴護必須潔已奉公埽除積弊約束丁役人等不准需索絲毫除札該守懷遵外合特札飭該局隨時密派親信委員赴卡查察或於商船抵岸時確切密訪儻敢仍蹈故轍立予稟撤

光緒九年四月鹽政左宗棠批湖北督銷局詳據詳係爲鼓勵司事起見以後武穴卡獲私在二十萬觔以上充賞准給四成在二十萬觔以內仍照向章二成充賞每月仍先給二成其加給之數應俟年終統算再給

光緒九年十月湖北督銷局程桓生等稟據武穴稽查委員稟稱查武穴一卡專司鄂湘引鹽掣驗稽查最關緊要以金陵掣驗局卡數計之五成之二以票鹽引數計之十成之六金陵局用月領八百餘兩武穴卡月領百五十餘兩金陵提私以二成充賞武穴提私過二十萬觔准加二成充賞惟提私觔兩數不可必薪水養贍日用所需卑卡司事薪水一項除文案不計外月領銀二十四兩見派兩班下河督查四人稱摠手各二名八人分派除火食外每人不足二兩之數勇丁口糧一項月領銀二十六兩八錢巡勇六名家丁二名號房跟丁厨

夫水火夫更夫各一名十三人分派除火食外每人四錢六錢不等此外其所希冀者在賞號一項以不可必之款仰爲日用所需之資其中難保不苛刻船戶存多提鹽勛爲幸之心誠非恤商之道擬請加給司事勇丁薪糧另繕清摺呈核再卑卡掣驗划船向未發給工價均由各鹽船零星給錢似屬非是見雇划船一隻水手二人工價由卡給發不准向鹽船需索分文經鹽政左宗棠批允

兩淮鹽法志卷五十一

兩淮鹽法志卷五十二

轉運門

淮北改票

兩淮舊行綱鹽自嘉慶末年至道光十年壞敝極矣淮南虧課至五千七百萬而淮北亦六百萬物窮則變變則通於是兩江總督陶澍始議改票

朝廷裁兩淮鹽政改歸兩江總督兼理先從淮北試辦初行於滯岸繼行於暢岸銷數溢額至預納兩綱課銀以贏餘融淮南懸引爲從來所未有軍興之際以鹽抵餉票法蕩然積引一綱有餘此非督銷不力時勢使然也

今將北鹺興替之由彙爲一編庶操禹筴者有考焉志  
淮北改票

道光十年兩江總督陶澍同尙書王鼎等會議另籌淮北  
條陳查淮北情形與淮南迥異淮南患於積鹽不銷淮  
北患於無鹽到岸緣淮北三場僻在海州每年一綱之  
鹽須於秋後漕船過竣開放雙金閘乘北運河下注之  
水趕運全完爲一年運岸之需科則每引僅一兩一錢  
無可再減惟商本甚重如五壩十損水陸節節盤駁最  
爲繁重勾損人等視爲恆業一經更張卽至恃眾滋事  
兼以各岸浮費甚多及商夥濫銷近年商力疲乏已極

能運秋單者僅止三數家其餘各商雖有認岸之名終年無鹽到岸小民無官鹽可買反仰給於私梟私鹽愈充則岸商益形裹足從前尙借助於淮南今商力已疲自顧不暇無可接濟淮北之商竟成坐困本年由運庫發銀十四萬兩收買約有四萬引趕運出關而商運之鹽僅二萬餘引竈戶積鹽不售無計資生饑寒交迫之餘豈能坐而待斃計惟速籌補救之法除廬州府屬及滁州來安各口岸改由江運者尙可與淮南食岸一律整飭外至湖運各岸近來額引銷不及半見商惟一二苟延殷商畏累觀望數十年來迄無良法必得設法改

道以清其源一面革退各岸乏商另招股商先籌官運  
以爲倡導之機一切章程另容次第籌辦惟目下情形  
鹽積如山無商收買各竈紛紛籲求調劑勢不能任其  
枵腹待售應請先行籌款收買竈鹽以濟口食其鹽存  
貯各場俟來年秋單發運之時查照銷滯各岸遴委賢  
員領運售鹽繳價歸還原本不致虛懸奉

旨允行

道光十一年十二月兩江總督兼管鹽政陶澍奏淮南商  
力雖疲然自開綱以來尙捆運五十餘萬引淮北則祇  
捆二萬餘引較定額不及十分之一實屬疲憊已久臣



前與尙書王鼎等會議時卽經聲請另行籌辦本年奏准借動帶運殘鹽課銀二十萬兩將官收竈鹽督商辦運均係擇其暢銷之岸先行運往以冀早將庫項收回而滯岸仍無鹽濟售民間旣無官鹽不得不買向民販竈丁積有餘鹽亦不能不賣與民販臣體察情形擬將暢岸仍歸商運其餘滯岸卽仿照山東浙江票引兼行之法於海州所屬之中正板浦臨興三場分設行店聽民投行購買運往售賣擇各場要隘之地設立稅局給以照票註明斤數及運往何處售賣字樣凡無票及越境者仍以私論如此通融辦理俾竈丁民販皆獲有生

計而所收稅銀又可補正課之不足臣拜摺後卽札行運司妥議條款酌量試行如果行之有裨再當漸次推廣設使行之不便亦不難於停止奉

特旨允行

恭載

上諭一道  
制詔門

道光十二年五月鹽政陶澍奏臣前因顧莼梁中靖卓秉鈺等條奏有鹽歸場竈設局徵稅之議經臣核議以兩淮鹽課甚重若改歸場竈恐致價隨稅長場鹽偷漏必多課稅更絀未敢輕議更張惟淮北滯岸久已無鹽接濟商疲課絀必須另籌辦理請仿照浙江山東票引兼行之法於海州所屬之板浦中正臨興三場設局抽稅

並委降調淮揚道鄒錫純前往查辦一切章程仍與署  
運司俞德淵會議妥詳奏蒙

恩准在案茲據鄒錫純帶同委員分路查勘情形會同署運司  
俞德淵籌議設局收稅章程具詳請奏前來臣覆加查  
覈所有淮北綱鹽其行安徽河南兩省四十一州縣內  
除安徽江運八州縣暨安徽河南湖運暢岸十一州縣  
近雖商疲引積尙非極敝之區有商認運者仍令商辦  
其商力支絀不能兼顧者官督商運一切照舊辦理外  
惟安徽之鳳陽懷遠鳳臺靈璧阜陽潁上亳州太和蒙  
城英山泗州盱眙天長五河河南之汝陽正陽上蔡新

蔡西平遂平息縣確山二十二州縣例由湖運稱爲極  
滯久已商通課欠配運不前歷年以來屢施調劑之方  
迄無成效又江蘇之山陽清河桃源邳州睢甯宿遷贛  
榆沭陽八州縣係淮北食鹽口岸向因私充官滯錢糧  
由綱商攤帶食商行無課之鹽近則費重銷絀食商配  
運亦復寥寥計滯岸二十二州縣內除天長一縣運道  
例由山陽寶應入高郵湖與淮南引地錯雜應仍歸商  
運以固藩籬外其餘二十一州縣應與食岸八州縣一  
律變通改行票鹽以資補救又安東海州兩州縣鹽法  
志載逼近鹽場例不銷引查安東距最近之板浦場已

一百餘里較沅潁距場爲遠海州逼近場地原可參用  
籌鹽之法惟淮北私梟並不赴場總係埽丁挑赴數十  
里外各邨鎮賣與稱手頭家轉售梟販若籌鹽一行此  
風仍難盡絕且緝私各卡因有籌鹽名目其不肖者必  
致任意賄縱一經拏獲私販必藉口買自籌擔而透私  
之場丁與得賄之兵役皆得置身事外亦應與安東改  
行票鹽以歸畫一或以票鹽有課居民食貴爲慮不知  
海州東南北三面皆湯得鹽甚易日食所資無須籌擔  
其零斤購用原無票稅可言況以見定科則計之居民  
卽日食票鹽三錢亦終歲不過用銀二分零不足病民

而籌擔一靖實可杜私未便瞻顧致誤全局至鹽法首  
重緝私而滯岸尤私鹽薈萃之所緝私從嚴一分則票  
鹽多銷一分見在勘定要隘卽於鄰近場地之海州東  
海錢家集三營挑派千把外委十一員兵二百七十名  
分卡巡防如果實力查緝銷數漸旺由臣隨時獎拔儻  
視爲具文虛糜巡費卽將弁兵斥革懲辦至局商必須  
得人方不至勾結奸販致啟影射夾帶之弊見據選保  
殷商王允泰等承充臣仍飭運司委員等隨時查察儻  
有弊端立卽斥革懲辦一面移咨皖豫兩省出示招徠  
民販赴場領票買鹽至票鹽事關創始必有以少課及

奸販滋弊爲虞且慮旁侵暢岸漸及淮南者然淮北十數年來引滯岸懸幾於無課可收且虛糜調劑銀兩不下百萬此時淮南商困未甦何能再籌款項調劑淮北且如辛卯一綱淮北配運不及十分之一各岸久爲私販占據今民販之赴場旣由州縣給照票鹽之出場又有卡員驗放與其任無課之私鹽肆行侵占不若行少課之票鹽尙可稽查其湖運暢岸與淮南各岸果能畫界自守則非商運之鹽所能侵越若巡緝疏懈私鹽且將充斥又何責乎票鹽見值商力極疲課項久懸而各岸需鹽甚急接濟爲難舍此別無籌策臣惟有督飭運

司及鄒錫純等妥貼經理如果行之有效稅課漸充再行推廣辦理儻有流弊無難卽行停止謹將設局收稅章程繕具清單恭呈

御覽一由運司刷印三聯空白票式一爲運署票根一留分司存查一給民販行運以板浦中正臨興三場各取上一字編列號數蓋用運司印信頒發三場大使收存民販納稅請票時該大使於票內填註民販姓名籍貫運鹽引數往銷州縣按道里遠近立限到岸聽其銷賣運鹽出場由卡驗放不准越卡亦不准票鹽相離及侵越別岸違者並以私論其照票給販赴所銷州縣衙門呈繳



由該州縣按月申繳運司查核其裁存票根卽由本場大使按旬造冊彙繳運司以備核對存查之票亦按旬申送分司備查一每鹽四百斤爲一引場鹽照見在錢價合銀六錢四分抽稅照商運科則酌減四分之一計銀七錢二分又傾鎔解費設局設卡經費各衙門書役紙飯委員薪水緝私經費等項五錢二分通計一引四百斤其庫平紋銀一兩八錢八分此外不得分毫需索其捆工包索聽民販自行經辦出示曉諭一面行知各州縣徧示招徠給照來場買運一滯岸各州縣招徠民販由該州縣給與護照載明姓名年貌籍貫給本人赴

場買鹽其海州附近居民及各省客民在海州貿易者  
卽就近在海州請領護照俱赴場大使衙門呈照請票  
該大使於護照內用一驗訖戳記仍另立號簿登記備  
查卽將護照同所請照票發還本人其護照准行三年  
更換如實在本場居住眾所共知者免其請照祇用手  
本呈明姓名年貌居址赴本場衙門投遞局商加具保  
結准其一體請票販運至每票買鹽自十引至百引以  
上爲一票不得過於零碎惟食岸八縣及向無額引之  
海州安東二州縣距場均在五百里以內應酌量變通  
海贛以百斤起票餘准一引起票以便民食至所領照

票鹽數無多程途旣近往返必速卽令於買運後鹽時  
定限在本場大使衙門呈繳仍按旬彙繳運司備查一  
三場各疇遠近多寡不一應於各場相度適中之地建  
立局廠以便竈戶交鹽民販納稅如板浦之東臨西臨  
等疇地界毗連擬於西臨疇設一局其大義于公等疇  
海濱寫遠擬於水路聚會之太平堰設一局中正場之  
中正等四疇地勢連屬祇於花垛垣設一局臨興場之  
正場等六疇相距六十餘里擬於臨浦設一局富安疇  
設一局統計三場共設五局均由運司遴委妥員每局  
一人常川駐劄遇有民販買鹽局商帶赴本場大使衙

門隨時納稅請票再由本局委員於三六九日各照票載引數同民販逐包稱驗於照票後用委員銜名驗訖字樣戳記聽其出場儻中途查出包內多帶惟局員是問一民販買鹽出場後必須由卡經過候卡員查驗有無中途添買夾帶然後分赴指銷口岸其卡隘設在近場百里內外水陸必經之處查海州之房山係陸路要隘又大伊山吳家集俱係水陸交通要隘擬設三卡均由運司委員督查一年期滿另委接辦遇民販到卡驗票抽稱果係包數斤重相符卽於票內鈐蓋某卡委員銜名驗訖字樣戳記放行不得稽留需索儻查有夾帶

卽移地方官究辦其鹽包應以淨鹽一百斤爲一包每引四包三場一律照辦民販旣經卡驗其餘經過各關祇須驗票放行毋庸再事檢查至經過州縣各有鹽捕衙門亦毋庸查驗以免擾累稽延運到認銷口岸赴當地州縣衙署繳票票內如無卡員戳記卽係越漏應照不應律懲治一臨興所屬之唐生興莊柘汪三疇僻在海隅距該場不下百里三疇相去又各有二三十里陸路旣艱水道隔絕每年官商收鹽須雇海舟運至臨浦方入鹽河與各疇情形不同向設青口食鹽店歲銷贛榆縣食鹽三百引有名無實三疇產鹽本旺多賣漁船

醃切今既改行票鹽應將食鹽店裁撤一律辦理惟地方遼闊局商多則經費難籌局商少又照料不及擬遴委妥員二人駐劄青口經理漁船醃切及本邑食鹽照見定章程給票收稅以杜透漏一運道必須肅清方可招徠查向來水陸私路如安東清河山陽盱眙泗州懷遠沭陽桃源宿遷睢甯邳州等處地界均由地棍土豪私立鹽關索費包送今改行票鹽民販一經納稅卽係官鹽誠恐各處惡棍習爲故常復向訛索儻不遂意難保無搶鹽之事擾害商販應先行出示曉諭並嚴飭地方文武認真查拏務使道路肅清匪徒斂迹儻有搶鹽

訛索等事立拏匪徒從重懲辦如不獲犯照例開參一  
緝私以防河爲扼要各場私梟透往皖豫引地總須渡  
過黃河查黃河渡口本有定所各河廳所轄多者五六  
處少者二三處其渡黃河船隻多係河員管理祇將黃  
河兩岸各渡口認真稽查不許渡船載私則梟徒何能  
飛越查廳營及文武汛官各有修防重任原難責以緝  
私然渡船多在有工處所又向歸河員管轄但令稽查  
渡船不准渡私則私鹽不緝而自靖應責成黃河北岸  
之邳北宿北桃北外北山安海安南岸之睢南宿南桃  
南外南海防海阜等十二廳營督率文武汛官稽查一

切官設私設渡船皆歸文武汛官專管儻渡船偷渡私鹽卽將渡船水手拏交地方官毋論人鹽曾否並獲但審有證據卽將渡船水手加重照窩私囤鹽例治罪官船另募管駕私船變價充賞一暢岸運商如因引地毗連慮及票鹽侵越暢岸情願獨認旁及滯岸票鹽自願藩籬者卽呈明本場大使轉報運司知照毋庸另給民販護照惟運商之認滯原爲保暢起見所認滯岸旣改票鹽其暢岸自應仍按原引完課無論銷數多少賣令照額全納以免虛占票地轉致暢岸缺銷至食鹽各岸並無暢岸可顧無須獨認以廣招徠一向來商認口岸



文武衙門往往私設陋規書役更多需索本屬違例見在票鹽多係民人販賣資本無多所有皖豫兩省滯岸及江蘇食鹽口岸各衙門自不容向民販索取陋規惟胥役兵丁仍恐藉端勒索一經民販訐告或別經發覺卽嚴行究辦以除積弊而肅鹺政奉

硃批依議妥辦欽此

謹按以上滯岸改行票法

道光十二年六月鹽政陶澍札據海州伍牧稟民販已陸續到場見值大雨連旬旱路阻隔必須雙金閘開方可啟運惟各運以鹽河之洪家蕩等處黃河之楊家莊洪

湖之南北兩岸向被地棍土豪結黨霸踞雖奉憲示禁止訛詐而兇徒匪類未必一見文告卽皆革面洗心實難保無以身試法之事又正陽臨淮各關隘胥役遇鹽船過關亦難保無需索勒捐逗遛情弊是以商販懷疑觀望事屬創行必須官爲倡導見據委員謝元淮與龔州判孫從九會同商籌該三員各自捐資公湊運本水腳先運五百引赴安徽之懷遠鳳臺等處銷售龔州判籍隸合肥毗連懷鳳該處風土人情素所深悉情願領運前往使各商販裝運隨行並選帶壯役沿途彈壓防護各商販見該員等倡導於前保護於路明明有利無

害自然踴躍該州判領運經過地方即可會同各該地方官剴切勸諭招致殷商使遠近周知底細各處聲氣聯絡自不難源源而來惟該州判係實缺人員非奉憲檄專委不能遠離境地且帶役無多必須經過文武衙門沿途一體撥派兵役護送過境始足以資彈壓而臻妥謐至令會同各滯岸地方官招致商販亦必須明奉憲檄並須檄飭各該地方官會同該州判廣爲勸諭招徠庶呼應較靈不致有名無實等情所議切中機宜具見實心籌辦龔州判籍隸合肥於懷鳳一帶風土人情素所熟悉候卽札委該州判領運懷鳳粟鹽五百引以

爲民販倡導之機併卽會同各滯岸地方官招徠民販  
廣裕運銷至孫從九見旣帶領巡壯堵緝湖河私鹽如  
稟卽委暫行代理海州州判印務並候札飭江藩司兩  
淮運司知照

道光十三年二月鹽政陶澍奏准北商運疲敝多年課食  
兩懸幾成虛設備極調劑之方總無挽回之益前經臣  
奏請改行票鹽於安徽河南之滯岸二十一州縣併江  
蘇之食岸八州縣及例不銷引之海州安東二州縣先  
行招販試運給予印票運行照舊額科則酌減三分之  
一徵銀七錢二分又鹽價銀六錢四分辦公各項經費

銀五錢二分議定設局設卡章程並聲明如果有效再行推廣辦理欽奉

諭旨允行在案其暢銷之江運八州縣湖運十一州縣仍留爲商人辦運原以改滯留暢俾累去利存即可漸培商力茲查票鹽自上年七月開局起至冬底截數已請運過二十萬三千一百餘引較原額溢運過半而所留商運暢岸開網兩年之久商人僅請運過十萬五千餘引加以官運六萬六千餘引亦尙未足商岸應運之額見在截數奏銷卽係以票販溢運之數撥補造報而商運引內仍有借欠底馬錢糧未完是商人之積疲莫振雖專

留暢岸尙不能勉力轉輸斷難望其轉機查票鹽自試  
行以來海屬積滯之鹽販運一空窮苦場民藉資甦活  
卽游手閒民亦得以轉移執事是以上年海州災務極  
重而地方尙稱安帖實得票鹽之濟其皖豫各省向多  
缺鹽之患官文上下絡繹督催商運仍然不前甚至閉  
門逃避百姓淡食不得已而買食私鹽地方官亦不得  
已而佯爲不知督銷有同具文且鹽價騰貴每斤需錢  
六七十文自票鹽到岸鹽價頓減取攜甚便民情安之  
從前私梟充斥每因地方乏鹽得以乘虛而入而各場  
亦因商不收買鹽無出路不得已而偷漏於梟其實場

民一與梟接卽受其脅制得不償失私梟雖多亡命之徒內中亦有身家鉅而走險原非所性茲旣轉運流通彼此無須偷漏卽可化梟爲良迥異從前之私充課紬見在票鹽之課溢於原額淮北通綱之引俱已請運全竣是票鹽之利業已試行有效自應欽遵前奉

諭旨卽行推廣辦理飭據陞署鹽運使俞德淵會同總辦委員鄒錫純核議具詳前來除例由江運之安徽省桐城舒城無爲合肥廬江巢縣滁州來安八州縣及例由高郵湖運之天長一縣俱與淮南引地錯雜未便招販行票致啓侵灌其原額八萬一千六百二十引照舊由商認

辦並隨時察看情形濟以官運保固淮南藩籬外所有  
湖運暢岸安徽省之壽州定遠六安霍山霍邱河南省  
之信陽羅山光州固始光山商城十一州縣額運九萬  
六千三百九十三引併食鹽融綱一萬三千三百五十  
五引請一律推廣照淮北滯岸章程招商販運改行票  
鹽查上年所議科則較原額酌減係因試行伊始輕本  
以利招徠旋因經費有餘撥還原額今既試行有效更  
可復還舊制應照淮北原定科則每引徵銀一兩五分  
一釐其另徵經費五錢二分爲傾鎔解費設局設卡巡  
緝委員薪水書役紙飯及公費等項之用上年既有節



省撥補正課應將經費酌減一錢二分每引徵銀四錢  
前定鹽價六錢四分亦酌減四分統計每引鹽四百斤  
爲一票共徵銀二兩五分一釐此外不許絲毫增加俾  
票販易於運行課項無虞短絀如有多運卽以融代江  
運之不足及未請殘綱各積引以彌全局惟思票販章  
程原議指定請運州縣填註票內越境卽以私論係屬  
保固商岸之意茲商旣運不敷額而票販所行各岸有  
請至數萬引者亦有僅請百十引者鹽多旣慮其滯銷  
鹽少又慮其乏食難免窒礙自應量爲變通如票鹽業  
已出卡經委員加印驗戳運行之後因所指州縣鹽壅

銷滯准其就所在地方呈明轉運他岸通融售賣但不  
得越出票鹽四十二州縣之界外儻或南侵淮南與江  
運各岸北越潞東長蘆各引地仍照私梟例治罪

謹按以上暢岸改行票法

道光十四年三月鹽政陶澍奏竊照兩淮掣鹽以二十引  
爲一馬各商按馬納課然後掣鹽發運謂之底馬錢糧  
乾隆年間北商因運艱課重懇先完一半錢糧給發底  
馬掣運限六箇月繳清課項謂之借馬迨嘉慶年間因  
積欠底馬銀兩較多經前鹽政臣延豐奏請停止道光  
七年前任兩江總督臣琦善前任兩淮鹽政臣張青選

於奏覆查明淮鹺積重情形案內欽奉

上諭准照從前借馬成案一律借給底馬自請程之日起限六箇月完繳轆轤借給等因欽此欽遵在案詎自借馬以來各商無不紛紛請照辦理前馬未還後借又多課款幾同虛設並且借藩籬爲名動需淮南調劑日累日甚課絀商逃近年改行票鹽章程易商爲販課項有增無缺計淮北湖運四十二州縣見已全改票販祇有江運八岸及天長一縣留歸商辦各商疲乏已久運鹽無幾若仍借給底馬必致延欠難歸應將淮北借馬之案停止仍按舊例先納課後運鹽以歸核實至淮南鹺務重大運

岸太遙偶值轉運不靈萬不得已之時酌量緩納提課歸款係屬暫時設法疏通以速商運並非常有之事且旋即委員赴岸守提於課款無虧不在此例合並聲明道光十五年六月鹽政陶澍奏淮北改行票鹽每引四百斤奏定例價六錢當試辦之初陳鹽堆積本多足供票運迨上年雨多曬少各販利在得鹽難免向池丁暗地加價爭先搶買兼之各場遠近不齊搬運各費遞有參差於票販亦多未便以致原定之數不敷照辦經該分司暨總辦委員詳請運司核議除例定六錢之外酌增籤席人工涵耗搬駁歸局等項各費每引各場銀三錢

青口一錢此項雖係池丁應得與課款無干仍隨同例  
定鹽價一併交納由各場大使照數轉發各池丁以歸  
畫一而免私增計每百斤不過加銀數分於成本不致  
增重而池丁可免賠累票販亦免於赴場搬運之繁仍  
俟場鹽旺產察看情形尙可隨時刪減並非例價一定  
可比所有此次官爲收買北鹽應卽照例價六錢之數  
毋庸另加籤席人工各費奉

硃批依議該部知道欽此

道光十五年六月鹽政陶澍定票鹽簡明章程

一民販來場請票自具手本載明姓名籍貫年貌赴分

司衙門挂號會同總辦委場局各官監號每號一百引  
稅課經費鹽價隨號呈驗當堂兌收給與收銀照票稅  
課歸庫鹽價歸場經費歸局板浦中正臨興三場每歲  
以二十二萬引爲額自正月開印日起逐日收銀上號  
號滿二千二百已敷引額卽行截止不得溢收青口另  
爲一局每歲以八萬引爲額由局員經理照辦

一票鹽每引仍照淮北從前每票併引四百四十斤出  
場舊則加耗捆重合每票引連耗四百二十斤外加包  
索二十斤共四百四十斤分裝四包每包連包索滷耗  
一百一十斤計每引稅課庫平紋銀一兩五分一釐經

費四錢鹽價六錢又十五年歸局捆運盡除豫賣擡價等弊酌加池丁滷耗籤席人工駁價銀三錢共二兩三錢五分一釐此外不准絲毫再加其鹽池丁散送赴局由局員驗係潔淨方許堆儲眼同民販裝包包繩由販自備捆運出局不准池丁在廩下交鹽亦不准民販私赴池頭就捆致有夾帶影混違者鹽罰充公仍從重究治

一板中臨三場各疇鹽池分上中下三則將二十二萬引均勻分攤某場應派若干號某疇某圩應派若干號逐一造冊按池配號卽於號上註明在某場某疇某池

丁某圩某竈戶池內買鹽以除袒抑避就之弊但須搭配均平不得少有偏枯其某池內配買之鹽均仍運局配捆

一本池鹽價民販照例定之數於上號時全交場員派池後另由場員給與捆鹽照票赴局捆運毋庸局商加具保結亦無須池丁再添圖記以免繁瑣至持票捆鹽後另換三聯大票掣驗出場其鹽價場員面給池戶手領不得絲毫剋扣至西臨局四疇花垛局四疇均係竈戶客池與本池有別不准妄添場商名目另設包垣致滋隔礙應照青口販稽曬埽之法辦理按池挨號接收



捆運其非由局給價者不准填給大票以杜池竈私賣  
包頭添價夾私等弊

一本池責成池丁將每日所收池鹽儘數歸局客池每  
圩公設包垣立竈頭一名責令督率各竈戶曬埽儘數  
歸垣報明場官局員立循環二簿登記聽候派販捆運  
不准私儲池頭暗藏私室所有土池俱不准埽鹽違者  
卽以私論

一板浦之胸山于公大義三疇在太平堰捆掣西臨東  
臨西三新增四疇在新關捆掣中正場之中正小浦東  
大東新四疇在中正捆掣中正場之中興富民二疇在

東辛捆掣臨興場之正場富安小防東官浦南北嶺子  
竈六疇惟正場在海河之南在臨浦設局捆掣餘五疇  
俱在海河之北相距較遠在富安設局捆掣其唐生興  
莊柘汪三疇在青口設局收稅唐生疇歸青口捆掣興  
莊柘汪各設分局捆掣以上各局俱由局員隨時按票  
掣驗截去大票平聲第一角加用局員驗訖戳記出場  
一票鹽出場必須由卡查驗海州鹽河在大伊山設卡  
薈薇河在海州西門外設卡沭陽縣六塘河在吳家集  
設卡均有委員駐劄票鹽到卡驗票抽稱包斤相符蓋  
用卡員驗訖戳記截去大票上聲第二角填寫月日放

行至清河縣之王營西壩由西壩委員驗明票鹽相符  
蓋用委員驗訖戳記截去大票去聲第三角渡黃過壩  
至順清河由順清河委員驗票蓋用委員驗訖戳記截  
去大票入聲第四角放令渡湖運往指銷州縣分售如  
越卡漏截均照偷漏關津例懲治其餘緝私各卡非票  
販經行之地不在此例

一運鹽大路一由薺薇河吳家集過卡由六塘河西行  
經沈陽縣之三尖子地方登陸六十里至清河縣之王  
家營西壩渡黃一由海州大伊山過卡水路南逕新安  
鎮入安東境由鹽河西行至清河縣之王家營西壩渡

黃如值上游雙金閘未開鹽河無水可運暫改陸路由新安鎮南行至安東縣搬隄西上抵壩此外黃河入灘六套等處及由海轉尖各處並贛沈等境內未經設卡各陸路均不准行走以杜繞越違者以私論照例嚴辦一照票一紙三聯右爲票根裁存申繳運司左爲存查留存分司中爲照票給販行鹽以板浦中正臨興三場各取上一字編號青口另用青字編號年月蓋用鹽政印信兩騎縫蓋用運司印信頒發海分司會同總辦委員轉發三場大使青口委員填用民販請票填註姓名籍貫指銷州縣每大票一張運鹽十引計四十包連包

索鹵耗其重四千四百斤行於湖運河南安徽各州縣  
暨食鹽口岸之山清桃安邳宿睢沭八州縣不准在海  
贛行銷以杜影射國私每小票一張運鹽一百斤祇准  
行海贛本境不准混行他岸以清界限其大小票均由  
總辦委員會同海分司按引收銀將票發交場官填寫  
販名口岸鈐印後送交局員加戳給販不得稍有舛錯  
一淮北引地除江運八岸及天長一縣另行辦理外其  
安徽省之鳳陽懷遠定遠壽州鳳臺靈璧阜陽潁上霍  
邱亳州太和蒙城六安英山霍山泗州盱眙五河十八  
州縣河南省之汝陽正陽上蔡新蔡西平遂平確山信

陽羅山光州光山固始息縣商城十四州縣江蘇省食  
鹽口岸之山陽清河桃源邳州宿遷睢甯贛榆沭陽八  
州縣又例不銷引之海州安東二州縣共四十二州縣  
一律行票按道里遠近立限到岸河南行票各州縣限  
五箇月到岸安徽各州縣限四箇月江蘇食鹽八州縣  
限兩箇月各於限內到岸赴所在州縣衙門呈繳照票  
踰限不繳票作廢紙鹽以私論海贛小票限十五日在  
本局繳銷踰限根查追究

一原定章程指定請運州縣填註票內越境卽以私論  
嗣因票行各岸有請至數萬引者亦有僅止百十引者

鹽多既慮其滯銷鹽少又慮其乏食旋於推廣暢岸案內奏准變通融銷如所指州縣鹽壅銷滯准其在該地方衙門呈明轉運他岸販賣但不准越出四十二州縣之界外儻南侵淮南與江運各岸北越潞東長蘆各引地仍照梟私例治罪

一海額食鹽用一百斤小票准民販請票買鹽挑往本境各鄉鎮銷售以資民食此項小票易滋透私必須示以限制查額榆縣每年額銷三百單引海州幅員較廣應酌加一倍每年准行六百單引計二十四萬斤按十二箇月分銷每月應行五十引遇閏照加春秋菜市用

鹽較多三四九十四箇月每月另加一百引共計一千引均用一百斤小票聽民請運儻有潛賣濟臬或藉票行私查出從重治罪其漁船醃切統歸青口買鹽以昭畫一

一票鹽經過沿途各州縣營汛驗票放行不得留難需索如鹽與票離或越卡漏截四角卽以私鹽查辦

道光十五年十二月署分司謝元淮稟竊淮北票鹽本年產多銷滯壩岸價低販本虧折來年課稅恐難踴躍亟應豫籌疏通之法從前改票之初鹽乾價廉歸局買賣是以商販爭趨迨後場池把持擡價豫賣不遵定章私



相交易以致成本加重販累日增及奉憲檄整飭重歸局捆而上年溢收錢糧二十餘萬引貲本既多占攔兼之私充銷滯西壩順清河積引十餘萬每包市價七八錢虧折尤甚穀賤傷農鹽賤傷販不可不早爲籌策爲今之計當以疏通岸引爲第一要著若欲壩岸速銷必須場鹽少出查淮北綱食各岸每年額行二十九萬六千九百八十二引自道光十二年試行票法五月開局收稅當年卽運行二十四萬二千六百餘引十三年行三十二萬餘引十四年行五十八萬九千三百餘引十五年行三十四萬八千六百餘引內有青口行銷二十

四萬四千餘引統計四年共運一百五十萬餘引而江  
運八岸及天長一縣歸於官運商運者尙不在此數內  
幾於一年行兩綱之鹽無論私鹽未能盡絕卽就已捆  
運岸之引而計則壅滯之原實由鹽多所致舊販鹽壓  
本攔不能轉輸新販卽有買運亦復運而不銷愈積愈  
多不得不跌價爭售甚至有售無受商販彷徨以脫貨  
救本爲幸大有渙散之勢夫緩則治本急則治標堵緝  
場私使無透漏清丈池面使無溢產歸局捆運使無擡  
價此治本之道也而大要總以疏銷岸鹽爲治標之急  
務見蒙憲委各員來場勘丈池面又專委總巡委員堵

緝私鹽場下諸弊自可漸次清釐惟見在票鹽陸運一事尤爲官私混雜易滋影射必應禁止查票鹽初行之時因岸食久缺准其水陸擇便行走原屬一時權宜今壩岸壅積如山尙復何煩接濟本年二月私鹽乘隙而出藉舊票重運以致官引不銷經卑職會同總巡委員周歷查緝稟立截角章程梟徒稍知斂迹而陸運仍多淆混巡役人等亦難徧詰應請將陸運一概停止以清界限祇許由板浦鹽河舟運過大伊山以達西壩其吳家集馬廠三尖子安東費家窯等處陸路車運一概禁止違者無論有票無票均以私論官引旣停凡有陸運

皆係私鹽海屬地勢平衍二三十里內一覽而盡巡緝亦易於查拏而徐邳山東一帶匪徒藉充車頭結黨滋擾地方者亦可潛消其患不致復蹈工損蟠踞之習票鹽既總歸大伊卡經行其吳家集薺微河兩卡專事堵私不得驗放船隻以歸畫一儻明春壩岸尙形壅滯或宜暫停春月舟運以資疏通之處俟臨時察看情形另行具稟請示遵辦再本年重頒章程內定限到岸有逾期不繳票作廢紙鹽以私論之語原爲舊票重運而設但雙金開開放每年不過一二次票鹽多有起棧待開者勢不能盡在限內到岸繳票轉啟口岸各衙門胥役

訛索之端應請一併出示通諭並行知皖豫銷引各州縣嗣後票鹽到岸總以順清河委員截第四角之日起限儻再逾期根查究辦庶可不致迫促其雙金開啟板下板之期亦請檄飭中河廳於十日之前先行移會海州分司以便傳諭各商販按時起運可免中道阻攔之患矣經署鹽政林則徐批允

道光十六年七月鹽政陶澍奏准北票鹽遵照章程隨時變通盡利截至六月已納課十八萬九千二百引加以去年溢運之鹽已如課額民販源源來者尙多惟須嚴查透漏不容鬆勁卽如黃河之八灘等處道光十三年

內江縣志卷三十二  
三  
曾經奏明設卡搬驗遇海州鹽河無水時准其由海轉  
尖入黃行走近年鹽河雙金閘水足資浮送從未由海  
轉尖應卽停止毋許鹽船由海道行走飭令廟灣東海  
各營嚴密巡查並卽札司籌酌於扼要之佃湖營馬李  
工等處專設卡員會同營員隨時堵緝以杜由海入黃  
透漏之私益昭嚴密

道光十七年二月鹽政陶澍奏淮北綱食各岸前因改行  
票鹽經臣將各州縣銷鹽考核於道光十二年奏請俟  
試行一二年後察看情形再行酌議具奏欽奉

諭旨俞允在案茲查淮北改行票鹽以來按綱請運足額且有

溢請之引均係票販自行運售並未由各州縣督銷覆查票鹽章程如所指州縣鹽壅滯銷准其轉運他岸販賣惟不准越出行票州縣之外是各州縣缺溢之數全難作爲定准咎無可任亦功無可居所有淮北鹽引行銷綱食各岸考核州縣督銷之處應請免置議以歸核實

謹按道光末票鹽暢銷收兩綱課銀爲極盛此後兵興北鹺不可問矣

咸豐四年五月鹽政怡良奏竊查淮北歷綱票鹽向係豫於年前開辦所有甲寅年應徵癸丑綱新課節經札催

海州分司遵照成案趕緊籌議開局收稅以濟餉需嗣據兼署運司郭沛霖詳據海州分司運判許惇詩稟稱淮北近日售價日疲銷市日滯皖省警報頻聞臨淮五河一帶節有土匪把持盤踞自懷遠至正陽關尤爲匪徒淵藪商販裹足正陽爲淮北暢岸向來每年可行鹽十餘萬引見已片引不行近聞廬郡失守正陽關居民紛紛遷徙湖販更加畏阻本年正月三旬西壩並未售鹽更兼三河壩未堵鹽須陸運上載盤駁費重並聞浮山口三十里河均已全涸以致懷遠以下之湖販亦復畏累不敢運鹽通計積引多至一綱有餘即使運道指



日肅清恐亦不能於數月中銷足一綱之鹽票販祇有一副資本且銀路多阻借貸無門開辦新綱實屬無可措手見在西壩賣價每包僅售七錢數分核計成本每包虧銀二錢有奇每引卽虧銀八錢有奇新綱科則若仍照舊徵收是驅之傾覆之地強令完納人情不順何以招徠體察情形斷非減輕成本不可而成本內如正稅雜課未敢擬減其餘經費先已減去八分駁費先已減去一錢見均不敷支用實難再減惟有代納淮南懸引課銀一款每引徵銀六錢九分三釐二毫零原案曾經聲明淮北銷滯卽當議停今淮南業已改章本無懸

引名目淮北疲滯至於此極萬難再令代納即使儘數減免每包輕本祇一錢有奇尙慮不敷擬請在於場商應得鹽價每引六錢內減銀一錢再減河費一分以符每引減輕八錢有奇之數等情前來卽經奴才以淮北久逾開綱之期自應急籌開辦當此庫儲支絀之時未便遽議減課當飭運司並逕札海分司就目前情形舍減課而外有無變通善策趕緊籌議速開新綱一面咨商安徽撫臣福濟就近查明安徽見在情形究竟有無窒礙並以後新綱事宜是否由奴才主稿會核辦理以免臨時往返咨商致稽時日卽日咨發去後茲據兼署

運司郭沛霖詳據海州分司通判許惇詩稟稱見屆甲寅年開辦癸丑新綱實因鹽壅貨竭北販辦運維艱萬難仍照二綱科則完納查淮北向有先鹽後課之案見在售價不敷卽予緩納票販亦不敢領運若官爲倡導引數無多且亦無此庫款籌墊水腳若議展限開綱讓出地步縱謂可以補救然數月之後若銷市仍滯彼時再議變通更恐遲誤除減課之外實無別法淮北正雜各課有關造報無從議減惟代納淮南懸引一款向不入淮北奏銷上年戶部籌撥淮北鹽課案內曾奉奏明見在淮南課款尙未辦有頭緒自可毋庸淮北協貼且

查從前加納懸引之案係奏明試行五年卽行停止今  
淮北疲敝已極北販實未能再代南商納無鹽之課與  
其引課虛懸南北兩誤似宜將此項懸引暫停以保全  
局等情經該兼署運司郭沛霖體察情形悉心核議所  
稟係屬實情應請將甲寅年開辦癸丑新綱代納淮南  
懸引一款全行停納經費向納四錢庚戌以後減徵不  
一本綱減徵八分並另將場商應得鹽價六錢內減去  
一錢仍於歷綱外辦徵文之河費內減徵一分以繫販  
情而維鹺局等情前來並准安徽撫臣福濟咨覆請減  
代納懸課誠恐該分司意存要挾應俟運司覆到再行

定見此後奏咨一切案件應由奴才主稿會辦未便往返咨商致稽時日恐有貽誤等因奴才察核該兼署運司所擬減徵課銀實緣補救疲綱慎重課項起見無非於時艱法敝之餘求商課兩全之策體察情形實亦未敢拘泥遲延致誤開局事宜正在繕摺會奏間復准河督臣楊以增函稱據該分司面稟前情非減納課銀新綱實難開辦察核尙係實情等因理合據詳籲懇

恩施俯念淮北銷路較前懸殊販情十分竭蹶准將代納淮南懸引課銀暫行停納其餘擬減外辦各款一律照減以便迅飭海州分司曉諭新舊各販照額全認並令實力

疏銷壩鹽趕納新課以濟餉需一俟道路稍通壩銷日起仍令照舊代納或卽按引提還當隨時相機辦理六月戶部議覆臣等伏查淮北鹽務自道光十二年改票以後每年行銷票鹽四十六萬餘引內融銷淮南懸引二十二萬代納課銀三十一萬餘兩並票鹽溢課協貼淮南銀三十六萬兩歷經奏報全完嗣於本年三月安徽巡撫福濟奏請分別開復頂戴案內聲稱正雜課銀全完尙有未徵懸課銀十九萬七千餘兩節經臣部咨催完報各在案茲據兩江總督怡良奏稱淮北近日售價日疲銷市日滯代納淮南懸引課銀籲懇

恩施暫行停納等語臣等復查淮北代納淮南縣引課銀三十  
一萬餘兩並協貼銀三十六萬兩十餘年來隨同正款  
徵解自應照常徵收以符課項乃詳閱原奏內該署運  
司等前後具詳情形並無疏銷裕課長策祇冀減免懸  
引一款誠如福濟所云該分司意存要挾且援引臣部  
籌撥案內淮南課款尙未辦有頭緒自可毋庸協貼一  
語希圖減課尤屬牽混查上年八月臣部奏撥淮北課  
銀三十六萬兩解充京餉所謂毋庸協貼者原以此項  
鹽課銀兩本應解部不必撥解淮南致多輾轉卽令徑  
由淮北提銀解京較爲迅速並非行令減免也該署運

司等何得援案影射豫爲誤課卸責地步所有請減代納懸課之處未便核准至奏稱經費四錢減去八分駁費減去一錢再於場商鹽價六錢內減去一錢河費內減徵一分以上各款均係外支外用非如懸引課銀撥解攸關可比應如所議准其酌減以輕成本惟淮北鹽務漸形累滯全在緝私招販經理得宜庶銷運疏通而課款可期充裕前經臣部以河督楊以增駐劄清江距海州較近情形易悉呼應亦靈奏令兼管在案應仍請旨敕下河督楊以增會同安徽巡撫福濟督飭署運司郭沛霖妥爲辦理再查海州分司許惇詩在淮年久於鹽務情



形自係熟悉應令該督等嚴飭該分司迅將場局王營西壩等處運售各事宜實力籌辦務令票額全完課款不得虧絀儻該分司因循推諉不知振作致課運稍有貽誤卽行從嚴參辦以儆玩泄至上年未完懸款銀兩並壬子綱奏銷已逾例限節經臣部咨催並令轉飭造報奏銷聲明懸課有無徵完以憑核議毋再遲延致干參處奉

旨依議欽此

咸豐四年九月鹽政怡良奏淮北壩銷疲滯引積課懸淮南懸引一款奏蒙

俞允茲據署運司郭沛霖詳遵卽督飭海州分司擇定八月二十日開辦新綱設局徵課查淮北開綱向在揚州設局開徵此次癸丑綱應責成海州分司在西壩設局開徵票販均應在壩繳課按旬具報徵有成數由司委員解應軍河緊餉如票販回課可以就近解交亦應鹽務委員領解各省委員不得取餉於壩販湖販之手所有該販等自運之鹽應聽其到岸售銷攜帶回課或裝買貨物輓轡轉運各營員弁兵勇不得藉提餉提課爲名沿途截留羈阻致令販情畏沮有礙新綱相應請

旨敕下皖省帶兵各員轉飭所屬員弁兵勇一體遵照以安商

販至地方官銷引缺額例有處分淮北行鹽引地全屬  
皖豫兩省近來私梟充斥土匪肆行地方官竟不過問  
因而官引滯銷上年逆匪竄皖以來廬州一府至今未  
復正陽六安英山霍山等處又時虞擾竄伏思堵剿逆  
匪責在帶兵各員查緝土匪私梟責在地方文武除由  
鹽務委員會同地方官督銷外應請

敕下安徽河南撫臣通飭所屬道府州縣按額督銷其各州縣  
銷引數目按月具報如再仍前怠玩嚴參懲處等情據  
此合無仰懇

天恩通飭遵照辦理復查淮北歷綱票鹽向係年前開辦年終

內河鹽法司卷五十二  
三  
造報本綱因引地未靖請停懸引奏咨往返爲時已遲  
又因袁甲三有壩鹽交官之議諸多未便數月未能定  
局今荷

綸音特沛冀挽頽綱但啟徵距造報定期僅餘四箇月開綱之  
遲實從來所未有本綱事惟仍舊懸課又復停徵

國家惟正之供斷難再令短絀奴才惟有會同河臣楊以  
增督飭運司海州分司等悉心設法辦理務令課款無  
虧趲辦迅速如果因積滯之鹽多於往歲往來轉運引  
地阻長淮北額引較多爲期促迫未能銷竣仍當隨時  
察看情形辦理再西壩官運一案見應停辦所有委員

已運之引已收之課奴才已咨袁甲三以八月初二日奉

旨之日截止飭令查明詳細造冊以憑發司核作收支分別造報經戶部議奏仍令將應徵正雜課銀及票鹽溢課均應照額徵齊循例年終造報奏銷奉

旨依議欽此

咸豐七年九月鹽政何桂清奏竊照淮北票鹽以三河尖爲銷路總匯而鹽船之赴三河尖者又必由正陽關自皖豫兩省被匪竄擾以後引地日蹙銷數日疲已有岌岌難支之勢正月三河尖又被賊擾鹽船資本久被焚

搶前督臣怡良會同河臣庚長督運司運判竭力設法  
始將甲寅綱應徵銀數催齊造辦奏銷臣蒞任後據前  
署運司郭沛霖以道路梗阻商販裹足詳請將乙卯新  
綱緩俟正陽關克復後再行開辦臣因爾時三河尖業  
經肅清正陽關之匪當亦不難掃蕩值此運餉支絀之  
時必應設法繞道疏銷徵課聊資接濟批飭接署運司  
喬松年會同見署運司聯英體察情形招商開綱去後  
茲據署運司聯英督飭淮北監掣同知兼署海州分司  
通判許惇詩以正陽關旣未肅清六安州尙爲賊距商  
販挾資經營鮮肯冒險嘗試惟引課未便久懸悉心籌

議請將乙卯綱淮北額運二十九萬六千九百餘引於  
八月二十二日開綱仿照歷辦章程派令各商認運將  
場鹽趁水趕運到壩俟正雜各課完納清楚再運出湖  
尙有溢銷之十六萬餘引係應歸協貼淮南之款俟河  
道通行接續配運所有甲寅以前各殘綱應請暫停以  
紓商力如有大販力能新殘並運者仍聽其便一切科  
則仍照甲寅綱徵完等情具詳請奏前來臣查淮北運  
道梗阻若不因時制宜酌量辦理則於徵課裕餉之方  
更無把握該署司等所議先派正額設法疏銷續籌溢  
銷之引係於萬難措手之中竭力挽救惟期正陽早日

肅清六安迅速克復即可接續派運趕赴年額奉

旨允行

恭載

上諭一道  
制詔門

咸豐十年十月署鹽政薛煥奏據兩淮運司喬松年詳稱  
淮北票鹽連年疲滯實異從前引地遞遭蹂躪販本日  
漸虧耗自春閒逆捻竄陷清江浦各販蕩析離居勢將  
倒罷查乙卯綱額課自咸豐七年八月至今已歷二年  
八箇月除陸續解交皖揚兩營軍需十八萬八千兩外  
其餘由各販撥鹽解營十二萬四千四十包作抵課銀  
十六萬三千餘兩共計三十五萬二千餘兩照額課造  
報之數已屬有盈無絀另行照例詳請題報奏銷第查



額課雖足而已運之鹽祇十二萬餘引其餘同各綱未  
運殘積尙多刻己申年辰綱尙未開辦若再籌運殘鹽  
新綱轉致羈滯故招集各販籌議於五月二十一日先  
行開辦丙辰新綱查照乙卯綱章程先儘奏銷額運二  
十九萬餘引認運應徵正課銀三十一萬餘兩儘解皖  
營軍需科則仍照乙卯完納所有各綱未運之鹽一概  
停止如有力能完納舊課新殘並運者亦聽其便其餘  
溢請之引一俟運銷暢旺再行察看情形續飭認運以  
爲得寸得尺之計等情具詳請奏前來當經飭令督同  
海州分司務須設法疏銷期符四十六萬引之額去後

茲據覆稱見在淮北運道雖已通行而引岸尙未全復兼之迭遭匪擾販力未舒惟有援照上綱先儘額引派完以副造報其餘溢引仍俟銷路暢通再行續運等情臣查淮北情形尙未復舊若不因時辦理於引課轉多窒礙除飭督販實力籌辦以期銷暢課增源源濟餉外所有據報開辦丙辰新綱緣由謹會同漕河總督臣王夢齡恭摺具奏奉

硃批戶部知道欽此

兩淮鹽法志卷五十二